

## ■ GLOSSA

# Uss discurr jau!

DA SILVIO CAMENISCH

**U**ss discurr jau la cussegliera governativa en las medias, han las bleras organisaziuns cun macaruns gratuits bain discurrì e miss en dumonda nossa cumpetenza legislativa! Nua manain nus in reschim ferm? Si Valzaina en Purtenz? Savais tge, vos bunumans? Igl è manegià bain, ma cuntanscha betg la finamira. L'emprim allontanai voss placats da protesta cunter il reschim d'urgenza, nu'essan nus? Betg en Iran, betg en Afghanistan. Davant las songas hallas dal teater da la citad d'uvestg e dal cussegli grond. Also bitte, in zic respect! Tge batarlan noss telechapricorns dressads, jau manegel agiustads a pro dal turissem! Ils agiustads a pro dals idioms èn adina stads qua. Pir sbal-lunai vossas stgatlas da macaruns, mida nagut vi da noss reschim d'agid d'urgenza e renzenza!

**V**a la moderatura Se-raina da telesidost betg sezza si Valzaina en il «Flüeli», vom jau si mezza. Jau chatt quest gnieu, jau manegel lieu, uschi-glio sai jau dumandar indigens ed asilants. Segir ch'ella è schon si qua ed ha retschavì quai ch'ella dovra per star pli ditg, memia ditg tenor lescha chantunala. Jau prend cun in deputà ambizius en bun senn da la partida amez, quella cun las schliaziuns per tuts cas!



En quest cas pia er en quest cas malempernaivel avunda! Jau vegn tratga medialmain tras la buglia: ch'ins n'haja nagin cor per asilants ed asils, dasper hai jau adina gi il cor al dretg lieu, savess er mus-sar el, mes cor. Fatsch jau gist liber qua sura, muss al docter! Schauen Sie, Herr Doktor! Das ist mein Herz. Mein ist das Herz!

**S**o. Giain nus dus ina Sgiada si en il «Flüeli», segir betg a viver ina vita retratga dal frà Clà, jau manegel quel da la Baselia catolica, manegel betg tselch da la baselgia litterara, u tuttina? Sco ierarchicas sa chapeschan omaduas ed han buns outsacerdots e dottas. Nus prendain crai jau cun buns cudeschs actuals u portatuns virtuals, u tge dis, collega? Si qua na datti nagins kioscs, La Quotidiana cun quatter idioms plus dastgas stritgar. Tragutta! I dat chaschiel charnpiertg e remiedi da quella buna gliued denturn, e sche ti dumon-

das mai: quella dovra massa atenziun mediala. I dat macaruns, quels repartess jau a pro idioms, fissan els da plirs, fissan els anc plirs. Els han nair basegn.

**I**l manadar spiertal è il docter cotschen verd soci! Dastgass ins spedir senza return en Stgirafica. Nus vesain bain al lieu ch'igl ha bissatgas, matratschas e sisur mattatschas. Ch'igl ha duschas e tualettas ch'ins vegn sperasor tranter las schlattainas. Essas enta pes ed era tranter pes, faschai plaz! Plaz! Tge dis ti Martin C. da la partida amez cun schliaziuns? Quest onn d'elecziuns èsi da vender schliaziuns, ellas vegnan cumpradas. Sale le sale! Tge panorama magni fic! Qua! Jau ses dator, guard da vegnir brina, la citad istorica qua giu è saufraida! Ussa duvrass jau Sez Ner u Piz Buin, egal tgenin per unscher en. Less betg ristgar in cancer da la pel, la chemo e perder mia frisura da ministra.

**S**umegl jau betg la sinistra ucraina Timoschenko? Bain. Sun jau aber era loscha. Vos dunnas cun fazilet, dumbrass betg las minuscalorias, dat perquai betg da pliras, savess betg pertge. Qua essan nus dirs, jau manegel dira cun nossa procedura d'asil diraglia, pli dira na vai betg pli! Bain, en la Ems Chemia è ella pli dira. U tge schais, lavurants e laborants? Ussa discorra ella, jau per mai hai discurrì.